

Na osnovu člana 61. stav (2) Zakona o upravi ("Službeni glasnik BiH", br. 32/02 i 102/09) i člana 33f. stav (2) tačke f) i h), a u vezi sa članom 33i. stav (2) Zakona o finansiranju institucija Bosne i Hercegovine ("Službeni glasnik BiH", br. 61/04, 49/09, 42/12, 32/13, 61/14 i 98/14) direktor Centralne harmonizacijske jedinice Ministarstva finansija i trezora Bosne i Hercegovine, donosi

PRAVILNIK

O GODIŠNJEM IZVJEŠTAVANJU O SISTEMU FINANSIJSKOG UPRAVLJANJA I KONTROLE U INSTITUCIJAMA BIH

I OPŠTE ODREDBE

Član 1.

- (1) Ovim pravilnikom se uređuje uspostava jedinstvene metodologije postupaka i rokova izvještavanja o finansijskom upravljanju i kontroli u institucijama BiH sa ciljem provjere stepena uspostave i kvaliteta finansijskog upravljanja i kontrole.
- (2) Primjenom jedinstvene metodologije osigurava se jednoobrazno sastavljanje godišnjih izvještaja sa odgovarajućim podacima potrebnim za izradu konsolidovanog godišnjeg izvještaja o sistemu finansijskog upravljanja i kontrole u institucijama BiH, koji Centralna harmonizacijska jedinica Ministarstva finansija i trezora Bosne i Hercegovine (u daljem tekstu: Centralna harmonizacijska jedinica) podnosi Vijeću ministara Bosne i Hercegovine.
- (3) Godišnje izvještavanje o sistemu finansijskog upravljanja i kontrole u institucijama BiH podrazumijeva izradu pojedinačnih godišnjih izvještaja institucija BiH i izradu konsolidovanog godišnjeg izvještaja o sistemu finansijskog upravljanja i kontrole u institucijama BiH.

II GODIŠNJI IZVJEŠTAJ O SISTEMU FINANSIJSKOG UPRAVLJANJA I KONTROLE U INSTITUCIJAMA BIH

Član 2.

- (1) Formu i sadržaj Godišnjeg izvještaja o sistemu finansijskog upravljanja i kontrole u institucijama BiH, kao i formu i sadržaje odgovarajućih upitnika i uputstava potrebnih za njegovu izradu, utvrđuje Centralna harmonizacijska jedinica vodeći računa o konzistentnosti godišnjeg izvještaja sa podzakonskim aktima donesenim u skladu sa članom 33b. Zakona o finansiranju institucija BiH.

Član 3.

- (1) Institucije BiH sačinjavaju Godišnji izvještaj o sistemu finansijskog upravljanja i kontrole popunjavanjem propisanih obrazaca za samoprocjenu sistema finansijskog upravljanja i kontrole.
- (2) Formu i sadržaj obrazaca za izradu Godišnjeg izvještaja o sistemu upravljanja i kontrole u institucijama BiH sa Uputstvom za izradu godišnjeg izvještaja objavljuje Centralna

harmonizacijska jedinica na web stranici Ministarstva finansija i trezora Bosne i Hercegovine (www.mft.gov.ba).

Član 4.

- (1) Godišnji izvještaj o sistemu finansijskog upravljanja i kontrole za prethodnu godinu, shodno članu 33d. stav (4) Zakona o finansiranju institucija Bosne i Hercegovine, dostavlja se u pisanoj i elektronskoj formi Centralnoj harmonizacijskoj jedinici najkasnije do 15. februara tekuće godine.
- (2) Rukovodilac institucije odgovoran je za tačnost podataka iz Godišnjeg izvještaja o sistemu finansijskog upravljanja i kontrole.

III KONSOLIDOVANI GODIŠNJI IZVJEŠTAJ O SISTEMU FINANSIJSKOG UPRAVLJANJA I KONTROLE

Član 5.

- (1) Centralna harmonizacijska jedinica, na osnovu pojedinačnih godišnjih izvještaja o sistemu finansijskog upravljanja i kontrole institucija BiH, sastavlja konsolidovani godišnji izvještaj o sistemu finansijskog upravljanja i kontrole za prethodnu godinu.
- (2) Centralna harmonizacijska jedinica upućuje konsolidovani godišnji izvještaj za prethodnu godinu Vijeću ministara Bosne i Hercegovine, putem Ministarstva finansija i trezora Bosne i Hercegovine, najkasnije do 31. marta tekuće godine.

IV ZAVRŠNE ODREDBE

Član 6.

Ovaj pravilnik stupa na snagu osmog dana od dana objavljivanja u "Službenom glasniku BiH".

Broj: 03-1-02-2-302-1/15
17. septembar 2015. godine
Sarajevo

Direktor
Centralne harmonizacijske jedinice
Ministarstva finansija i trezora BiH

Ranko Šakota, v.r.